



N°780  
Entrée le 23.05.2024  
Chambre des Députés  
Déclarée recevable et urgence non-reconnue  
Président de la Chambre des Députés  
(s.) Claude Wiseler  
Luxembourg, le 23.05.2024

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 22/05/2024

Här President,

**Sou wéi den Artikel 81 vun eisem Chambersreglement et virgesäit, biede mir lech, dës dringend parlamentaresch Fro un d'Ministere fir den Interieur & Justiz weiderzeleeden.**

Säit längerem gëtt op europäeschem Niveau probéiert, eng Majoritéit fir den ëmstriddene Projet vun der sougenannter Chatcontrol ze fannen. All digitale Messenger-Ubidder soll domat obligéiert ginn, d'Norichte vu senger Benotzer:innen automatiséiert ze iwwerwaachen.

An der Äntwert op meng parlamentaresch Fro N<sup>o</sup> 8350 iwwert d'Chatcontrol hat déi deemoleg Regierung gesot, dass si sech an deem Dossier "fir eng méi cibléiert Detektoun vu pedopornographeschem Material a Grooming" géif asetzen, "fir eng generell Iwwerwaachung ze vermeiden". Den deemolegen Text hat domat keng Ënnerstëtzung vu lëtzebuergescher Säit kritt.

Well de Projet insgesamt a senger ursprénglecher Form op ze vill Kritik gestouss war, goufe rezent dofir kleng Ännerungen un der *Regulation laying down rules to prevent and combat child sexual abuse* virgeholl, mam Zil, esou e Konsenz fir d'Chatcontrol ze erreechen. Duerch Leaks ass elo bekannt ginn, dass den neien Text den 8. Mee 2024 virgestallt gouf an de 24. Mee eng weider Kéier beschwat soll ginn, mam Zil, d'Chatcontrol schonn am Juni vun dësem Joer beschléissen ze kënnen.

An deem Zesammenhang wéilte mir de Ministeren dës Froe stellen:

1. Ween wäert fir Lëtzebuerg un der Reunioun vum 24. Mee deelhuefen?
2. Wéi eng generell Positioun wäert Lëtzebuerg den 24. Mee an dësem Dossier anhuelen?
3. Ass d'Regierung der Meenung, dass déi nei proposéiert "Uploadmoderation" sech vum „Client-Side Scanning“ ënnerscheet a wäert d'Regierung déi Propose de 24. Mee ënnerstëtzen?
4. Ass d'Regierung der Meenung, dass ee beim nei proposéierte System, dass all d'Notzer:innen der Iwwerwaachung per Klick explizitt zoustëmme solle mussen, vun engem fräie Choix schwetze kann, wa gläichzäiteg gefrot gëtt, dass d'Messengerdéngschter ouni dës Zoustëmmung net méi a vollem Ëmfang genotzt solle kënnen ginn?  
Wäert sech d'Regierung de 24. Mee fir oder géint dës Propose ausschwätzen?
5. Wäert d'Regierung de 24. Mee bei der Positioun vun der viregter Regierung bleiwen, dass eng generell Iwwerwaachung muss vermidde ginn, esou dass e systematescht Scanne vu Biller a



[www.piraten.lu](http://www.piraten.lu)

Videoen an en automatiséiert Ausleeden un d'Police net ënnerstëtzt wäert ginn?

Mat déiwem Respekt,



CLEMENT Sven  
Deputéierten



POLIDORI Ben  
Deputéierten



[www.piraten.lu](http://www.piraten.lu)



**Gemeinsam Äntwert vun der Madamm Justizministesch Elisabeth MARGUE a vum Här  
Inneminister Léon GLODEN zu der parlamentarescher Fro n°780 vum 22. Mee 2024 vun den  
honorabelen Deputéierte Sven CLEMENT a Ben POLIDORI iwwer dat geplangten EU-Reglement  
vun der Kommissioun fir géint sexuell Gewalt géint Kanner am Internet virzegoen**

Ad 1)

D'Regierung war an der Reunioun vum Aarbechtsgrupp vum 24. Mee 2024 duerch d'Représentation permanente vu Lëtzebuerg bei der Europäescher Unioun vertrueden.

Ad 2) bis 5)

En effektive Kampf géint de sexuelle Mëssbrauch a sexuell Ausbeutung vu Kanner ass fir d'Regierung eng Prioritéit. Fir méi konsequent kënnen dergéint virzegoen, ënnerstëtzt d'Regierung d'Ustrengeunge fir um Niveau vun der Europäescher Unioun d'Gesetzgebung ze stäerken, esouwuel wat d'Detektioun, de Signalement, d'Blockéieren ewéi och d'Läsche vu kannerpornographeschem Material um Internet ugeet.

Esou wéi scho vun der viregter Regierung an den Äntwerten op d'parlamentaresch Froen n°7956 vum 3. Mee 2023 an n°8350 vum 26. September 2023 uginn, hält och dës Regierung un der Wichtigkeet fest, dass dobäi essentiel Grondrechter vun de Bierger garantéiert bleiwen, an dass dat proposéiert Reglement d'EU-Recht, ënner anerem de Proportionalitéitsprinzip, respektéiere muss. Genau wéi et de Service juridique vum EU-Conseil a sengem Avis iwwer d'Legalitéit vun der sougenannter "Chatkontroll" recommandéiert, ass d'Regierung fir eng méi cibléiert Detektioun vu pedopornographeschem Material a Grooming a fir d'Vermeide vun enger genereller Iwwerwaachung.

D'Regierung begréisst an deem Sënn déi proposéiert Ännerungen, wéi zum Beispill d'Kategorisatioun vun de Risiken duerch eng definéiert Methodologie oder d'Limitatioun vun de sougenannten „detection orders“ op visuelle Contenu an op Internetadressen (*URL - Uniform Resource Locator*).

Allerdéngs bleift d'Regierung der Meenung, dass déi proposéiert Modifikatioune vum Text, ënner aneren d'„Uploadmoderation“, déi en Deel vun engem „Client-Side Scanning“ duerstellt, net de Risiko vun enger genereller Iwwerwaachung reduzéieren an och de Krittär vun der Proportionalitéit aus der Charta vun de Grondrechter vun der EU net erfëllen. Den Dispositif schléisst nämlech nach ëmmer net aus, dass d'Kommunikatioune vun all de Benotzer vun engem Service, och vun deenen déi iwverhaapt kee Lien mat der Strofdot hunn, kënnen gescannt ginn.

Aus deene Grënn kann d'Regierung den Text, esou wéi en aktuell virläit, nach ëmmer net matdroen.

Lëtzebuerg, den 24 Juni 2024.

D' Justizministesch

(s.) Elisabeth Margue